

आकाशवाणी जयपुर-अजमेर
प्रादेशिक समाचार
दिनांक 16.06.2025 समय: 18.45 बजे

- देश की 16वीं राष्ट्रीय जनगणना सारू अधिसूचना जारी— दो दौर मांय डिजिटल तरीका ऊं गिणती करी जावेलां
- प्रधानमंत्री नरेन्द्र मोदी ने साइप्रस रा सब ऊं ऊंचा मान ऊं नवाज़ी ज्यां
- गृहमंत्री अमित शाह राज्यां रा राहत आयुक्तां ने आवता 90 दिन मांय हर ज़िला सारू आपदा प्रबन्धन योजना तैयार करण बाबत् कह्यो
- लोकसभा अध्यक्ष ओम बिरला वां रा संसदीय हलका मांय बडोद अर ढीबरी बीचे कालीसिंध नदी माथे बणायी ज्या पुल रो उद्घाटन कीनीं
- मौसम विभाग प्रदेश रा 14 ज़िलां मांय आज मझला दर्जा की अर 12 ज़िलां मांय हल्की बरसात व्हेवण सारू चेतायों

000

देश मांय पहली दफ़ा व्हेवण वाळी जातिगत जनगणना सारू आज अधिसूचना जारी कर दीरीजीं जनता की गिणती रा काम सारू करीब 34 लाख प्रगणक अर सुपरवाईजर अर करीब एक लाख तीस हजार जनगणना पदाधिकारी तैनात कर्या जावेलां आ जनगणना मोबाइल एप्लीकेशन रे जरिए डिजिटल तरीका ऊं करी जावेलां जणता की गिणती की संदर्भ तिथि पहली मार्च 2027 व्हेलां केन्द्र रा राज वाळा प्रदेशां लद्दाख अर जम्मू-कश्मीर अर हिमाचल प्रदेश अर उत्तराखंड राज्य मांय जनगणना पहली अक्तूबर 2026 ऊं करायी जावेलां दो दौर मांय करायी जावण वाळी जनगणना की अधिसूचना आज जारी कर दीरीजीं जनगणना रा पैला दौर मांय हर पिरवार रा घर रा हालात, माल-असबाब अर सुबीतां रा बारा मांय जाणकारी ली जावेलां दूजा दौर मांय हर जणा की जनसांख्यिकीय, सामाजिक-आर्थिक, सांस्कृतिक अर दूजी जाणकारी भेळी करी जावेलां आ भारत की 16वीं अर आज़ादी पाछे 8वीं राष्ट्रीय जनगणना व्हेलां

000

प्रधानमंत्री नरेन्द्र मोदी ने यूरोप रा देश साइप्रस रा सब ऊं ऊंचा मान ग्रांड कॉस ऑफ द ऑर्डर ऑफ मैकरियोस ऊं नवाज़ी ज्या हैं साइप्रस रा राष्ट्रपति निकोस क्रिस्टोडोलीडेस वां ने नवाज़ां ई मौके प्रधानमंत्री मोदी कह्यो के ओ मान भारत अर साइप्रस बीचे आपसी साझेदारी अर दोस्ती ने समर्पित हैं इण ऊं पैली श्री मोदी साइप्रस रा राष्ट्रपति श्री निकोस अर दोन्यू देश रा कारोबारी नुमाइंदां सागे मीटिंग कीनीं प्रधानमंत्री कह्यो के साइप्रस भारत सारू प्रत्यक्ष विदेशी निवेश रा हलका मांय खास माली साझेदार है अर दोन्यू देश दुनिया की शांति अर स्थिरता मांय विश्वास राखे हैं

.....

प्रधानमंत्री मोदी रो अब कनाडा मांय जी-7 शिखर सम्मेलन मांय सिरकत करण रो कार्यक्रम हैं ई दौरान वां की कनाडा रा प्रधानमंत्री मार्क कार्नी अर दूजा देशां रा राष्ट्राध्यक्षां सागे मुलाकात रा आसार हैं

000

गृहमंत्री अमित शाह राज्यां रा राहत आयुक्तां ने आवता 90 दिन मांय हर ज़िला सारू आपदा प्रबंधन योजना तैयार करण बाबत् कह्यो हैं वे आज नई दिल्ली मांय राज्यां अर केन्द्र रा राज वाळा प्रदेशां रा राहत आयुक्तां अर आपदा मोचन बलां रा सम्मेलन मांय बोल रह्या हां

श्री शाह कह्यो के भांत-भांत री आपदावां रो सामो करण सारू ज़िला स्तर माथे आपदा प्रबंधन योजना तैयार व्हेवणो जरूरी हैं गृहमंत्री कह्यो के सरकार आपदावां रो सामो करण रा काम सारू आपदा रा हालात मांय किण ई रे हताहत नी व्हेवण रा लक्ष्य सागे नीतियां बणा रही हैं

000

राजस्थान लोक सेवा आयोग री ओर ऊं आरएस मुख्य परीक्षा 2024 काल अर 18 जून ने ली जावेलां आ परीक्षा अजमेर अर जयपुर मांय 77 परीक्षा केंद्रां माथे दो पारियां मांय व्हेलां आयोग रा सचिव रामनिवास मेहता बतायो के आ परीक्षा 1 हजार 96 ओहदां माथे भर्ती सारू ली जावेलां

000

नर्सिंग अधिकारी भर्ती सामान्य पात्रता परीक्षा-एन.ओ.आर.सी.ई.टी. अब साल मांय दो दफा करायी जावेलां स्वास्थ्य अर परिवार कल्याण मंत्रालय रे मुजब हाल ताई आ परीक्षा साल मांय एक दफा ली जावे हैं इण ऊं टेम सर भर्ती अर मरीजां री सार-संभाळ ऊं जुड़्या सुबीता लगातार मुहैया कराया जा सकेलां आ परीक्षा एम्स नई दिल्ली री ओर ऊं ली जावे हैं

000

लोकसभा अध्यक्ष ओम बिरला आज कोटा ज़िला रा पीपलदा हलका मांय विकास रा न्यारा-न्यारा कामां री नीव रखी अर पूरा व्हा काम जनता ने सूंयां वे बड़ोद अर ढीबरी बीचे कालीसिंध नदी माथे बणायी ज्या एक हाई लेवल पुल रो उद्घाटन कीनों ई मौके श्री बिरला कह्यो के आवता अढाई साल मांय हलका रा हर गांव मांय नवनेरा बंधा ऊं पीवण रो साफ पाणी पूगा दियो जावेलां

.....

पुल माथे आवण-जावण सारू व्हेवण ऊं बरसात रा दिनां मांय ई राजस्थान अर मध्यप्रदेश बीचे सम्पर्क बण्यो रहवेलां ओ पुल बणावण रा काम माथे करीब 90 करोड़ रुपया रो खर्चो आयो हैं

000

कांग्रेस पार्टी राज्य मांय नौजवानां ने आगे लावण सारू चुणाव मांय आधा टिकट 50 साल ऊं कम उम्र रा उम्मीदवारां ने देवेलां प्रदेश कांग्रेस अध्यक्ष गोविन्द सिंह डोटासरा आज जयपुर मांय खबरनवीसां सागे बातचीत करता थकां आ जाणकारी दीनीं वे कह्यो के पंचायत चुनाव रा टिकट देवण मांय संगठन रा ओहदादारां रो खास काम व्हे हैं डोटासरा राज्य सरकार माथे निकाय अर पंचायत चुनाव मांय मोड़ो करण रो आरोप माण्ड्यो

.....

नगरीय विकास मंत्री झाबर सिंह खर्वा श्री डोटासरा रा आं आरोपां ने बेबुनियाद बतायां वे प्रदेश भाजपा कार्यालय, जयपुर मांय राखी ज्यी प्रेस वार्ता मांय कह्यो के सरकार ई बारा मांय तैयारी कर रही हैं

.....

राज्य मांय चौमासा ऊं पैली री बिरखा व्हेवण ऊं पारो उत्तर्यो हैं आज कठे ऊं ई लू बाजण रा समाचार नी हैं मौसम विभाग रे मुजब आज कोटा, उदयपुर, भरतपुर, अजमेर अर जयपुर संभाग रा ग्यारह जिलां मांय भारी बारिश रा आसार है जदके जोधपुर अर बीकानेर संभाग रा कुछ जिलां मांय हल्की ऊं मझला दर्जा री बरसात री संभावना हैं लारला चौबीस घंटां मांय राजसमंद, अलवर, भरतपुर, अजमेर, कोटा, जोधपुर, पाली अर जालौर मांय चोखो मेह बरस्यो

वहीं राजसमंद जिला रा आमेट मांय सब ऊं बत्ती 10 सेंटीमीटर बिरखा व्हीं झालावाड़ अर कोटा मांय जबरदस्त उमस पाछे बिरखा व्हीं भीलवाड़ा मांय रिमझिम बारिश व्हेवण सागे सीळो बायरो

बाज्यों कोटा मांय आधा घंटा ताई झमाझम बिरखा व्हीं बारां जिला रा किशनगंज, नाहरगढ़, अटरू अर मांगरोल मांय ई चोखो मेह बरस्यों अटरू हलका रा मायथा भेरुजी मांय बीजळी पड़ जावण ऊं दो जणां री मौत व्हे गयी अर दो जणा घणा झुलस ग्यां हनुमानगढ़ जिला मांय पीलीबंगा हलका रा दुलवाना गांव मांय नहर मांय डूब जावण ऊं आज एक ही परिवार रा 3 बच्चां री मौत व्हे गयीं राजसमंद जिला मांय देवगढ़ कने स्वादड़ी गांव मांय घर कने पाणी भर्या खाड़ा मांय डूब जावण ऊं दो बच्चां री मौत व्हे गयीं

000

अंतर्राष्ट्रीय योग दिवस रा सिलसिला मांय आकाशवाणी जयपुर रा क्षेत्रीय समाचार एकांश री ओर ऊं संदेश श्रृंखला चला र योग ने रोजमर्रा रो हिस्सो बणावण री प्रेरणा दी जा रही हैं आज पेश है जयपुर री योग री जाणकार डॉ. शशि रो संदेश वे सगळां ऊं योग अपना र, मददगार बण र देश सारू काम रा बणबा री अपील कीनीं

.....

11वाँ अन्तर्राष्ट्रीय योग दिवस नज़दीक आवण सागे ई दुनियाभर मांय योग ऊं जुड़्या भांत-भांत रा आयोजन कर्या जा रह्या हैं प्रदेश मांय ई योग दिवस काउंटडाउन रा तैत कार्यक्रम राख्या जा रह्या हैं विधानसभा मांय आज सामूहिक योगाभ्यास रो कार्यक्रम राख्यी ज्यों इण मांय विधानसभा अध्यक्ष वासुदेव देवनानी समेत मंत्री मण्डल रा सदस्य अर विधायक सिरकत कीनीं ई पाछे खबरनवीसां सागे बातचीत करता थकां श्री देवनानी कह्यो के योग जीवन रो विज्ञान है, जो मन, बुद्धि अर शरीर रो संतुलन बणावे हैं

.....

संसदीय कार्य मंत्री जोगाराम पटेल आज दौसा मांय जिला स्तर रा अहलकारां सागे मीटिंग कर र वंदे गंगा जल संरक्षण जन अभियान रा तैत कराया जा रह्या कामां री प्रगति रो जायजो लीनों श्री पटेल कह्यो के चौमासा मांय बिरखा रा पाणी भेळो कर्यो जावणो चाहिजे अर लक्ष्य रा आधार ऊं पौधा रोप्या जावणा चाहिजें

000